

Diabierna ultimo destaho publico a tuma lugar

Trabaonan di embeyecimento na Baby Beach cla pa cuminsa



ORANJESTAD (AAN): Diabierna pasa e destaho publico a tuma lugar pa e trabaonan di embeyecimento na Baby Beach y Thiel Corporation a gana e destaho pa realiza e trabaonan.

Despues cu durante un conferencia di prensa Minister Oduber hunto cu su coleganan Mike de Meza y Benny Sevinger a auncia cu e destaho lo sali pa loke ta trata e proyecto di Baby Beach, diabierna 30 di au-

gustus esaki a tuma lugar. E compania Thiel Corporation ta e compania cu a gana e bid cu un suma total di 1.7 miyon Florin.

Ta calcula cu dentro di 3 siman e trabaonan di embeyecimento lo por cuminsa y ta premira cu dentro di 6 luna e proyecto lo ta completamente cla.

Minster Otmar Oduber a duna di conoce cu durante e ultimo 10 luna a traha riba diferente cambio cu mester a tuma lugar pa loke ta trata

e plannan pa por acomoda Baby Beach di tal forma cu lo bay mehora e infraestructura di e parkeo na unda e veld ta na e momentonan aki.

Tambe a prepara e expansion pa loke ta Baby Beach mes banda pabou, vergroening, lo bin e luznan cu tabata ser spera pa hopi tempo y asina eleva e aspecto di seguridad y cu na mes momento lo permiti e uso di Baby Beach te den oranan di anochi. Ademas

lo bin un scheidingwand caminda cu e veld ta, es decir, lo alarga e muraya pa por evita dañonan na e beach na momento cu awacero bendiciona nos isla.

“Naturalmente lo amplia henter e area aki cu infraestructura di kioskonan cu lo worde poni den e area di Baby Beach hunto cu instalacionnan di baño, etc pa di e forma aki nos por logra haci di Baby Beach y aplica pa e por bira e promer Blue Flag certified beach na Ar-

uba. Esaki lo haci cu Baby Beach por bira un atraccion mundial mirando e reputacion cu e certificacion aki tin”, Minister Otmar Oduber a duna di conoce.

E mandatario, mescos cu su coleganan, for di cuminsamento di e periodo ministerial a mustra un interes grandi pa desaroyo di pariba di nos isla. Diferente proyectonan a worde realiza y otronan ta den proceso. Minister Oduber ta indica cu Gobierno a opta pa mehora e calidad di beach no solamente di Baby Beach, pero tambe esun di Zeewijk/Cura Cabay (pa loke ta e parti pariba di nos isla), hunto cu e posibilidadnan cu ta worde crea di desaroya economicamente otro interesnan pa nos bishitantenan, particularmente pa pariba di nos isla.

Pero e no ta keda te aki, el lo combina esaki cu e decision di Gobierno pa lanta e moratorio di tourbusnan pa e area di pariba di brug. Asina a tuma e decision pa duna 15 tourbus un vergunning nobo caminda cu estrictamente e destinacion mester ta San Nicolas y ta pone cierto partinan cu mester worde bishita y termina sea den centro di ciudad di San Nicolas, como tambe Baby Beach.

Adicionalmente, e rapport Winning the Future ta mustra cu Aruba ta worde demasiado mira como un pais desaroya, practicamente como un ‘little Miami’ y e generacion nobo ta buscando aspectonan cultural ora nan ta bay cu vakanti, nan ta buscando e herencia, e historia di e pais.

Ponendo mas enfasis riba e parti aki e mandatario a bisa cu ta importante pa mustra cu “Aruba no ta djis un strip di hotel na Palm Beach, pero cu nos tin otro banda di nos isla cu tin hopi di e factornan cu nos ta buscando pa atrae turismo: San Nicolas ta e unico distrito cu tin loke Aruba falta: cultura, historia, herencia y tur e aspectonan cu turistanan na nivel mundial ta bisa cu nan ta buscando. San Nicolas mester bira e di dos capital turistico di Aruba”.

Pesey e ta bisa cu ta mas cu logico cu esaki ta e distrito cu tin cu bay desaroya den e direccion ey, esaki por worde haci unicamente door di tin e curazon pa pone e diferente elementonan hunto, combina cu esfuertonan pa crea incentivosnan fiscal bon balanza.